



Eqqumiitsuliortut eqqumiitsuliornikkut suliaqartillutik akissarsiaasa B-indkomstitut tigusinnaalersillugit periarfissaqalernissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C Jerimiassen, Atassut)

(Siullermeerneqarnera)

Qujanaq Inatsisartunut ilaasortaq Aqqalu C Jerimiassen siunnersuummut.

Eqqumiitsuliortut eqqumiitsuliallu tamatsinnut pingaaruteqarput. Annermik nuannaarnermik eqqarsalersitsinermillu pilersitsisarput. Demokraatinut pingaartuuvoq, qulakkiissallugu, eqqumiitsuliortut pitsaasunik atugaqartitaanissaat nutaaliaminnik suliaqarnerminni.

Neriuppugut aamma, imaalissasoq, eqqumiitsuliortut amerlanerit eqqumiitsuliatik nutaaliatillu inuussutigilersinnaassagaat annertunerusumik isertitaqarnermikkut.

Una siunnersuut eqqumiitsuliortut akileraarutaannut tungassuteqarpoq. Uani mianersuutigissavarput, eqqumiitsuliortumut ataasiakkaamut suna pitsaanerunersoq politikkikkut aalajangertussaagatsigu. Arlalinut immaqa pitsaanerpaassaaq akiligassamik nassitsigaanni namminerlu akileraarutitut akiligassartaa isumagalugu? Allanut immaqa pitsaanerpaassaaq erngerlugu akileraarut akilerpat imatut, eqqumiitsuliortumik sulisitsisup A-skattimut uninngatitsilluni? Aammalu allanut immaqa pitsaanerpaassalluni nammineerluni akileraarutitigut akiligassaq B-indkomstitut nalunaarutigigaanni?

Demokraatini kissaatigiinnarparput, eqqumiitsuliortumut pisariittuussasoq aammalu, qulakkiissagipput, inuiaqatigiit isertitanit naammaginarumik isertitsinissaat akileraarutitut akiliuteqarnikkut.

Periarfissat tamarmik isiginiarneqarnissaat ammaffigaarput. Pisariaqanngitsumik eqqumiitsuliortuunissaq maani nunatsinni siunertarinngilarput, taamaattumillu kajumissaarutigerusullugu, eqqumiitsuliortut siunnersuutip uuma suliarineqarnerani akuutinneqarnissaat.

Siunnersuut oqaaseqaaserlugu Aningaasaqarnermut- aamma Akileraartarnermut ataatsimiititaliami suliarineqartussatut innersuussutigaarput.